

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренијски савјет

R J E Š E N J E

**po prijavi namjere koncentracije privrednih subjekata „Konzum“ d.o.o. Sarajevo i
„Dujmović-Commerce“ d.o.o. Mostar**

**Sarajevo,
juli 2009. godine**



Broj: 01-01-26-022-5-II/09
Sarajevo, 21.07.2009. godine

Na osnovu čl. 25. stav (1) tačka e) i 42. stav (1) tačka d), a u vezi s čl. 12., 14., 16., 17. i 18. Zakona o konkurenciji («Službeni glasnik BiH», br. 48/05 i 76/07), rješavajući po Prijavi namjere koncentracije privrednog subjekta Konzum trgovina na veliko i malo d.o.o. Sarajevo, Rajlovačka bb, Sarajevo, BiH, kojeg zastupa direktor Ismir Brkić i privrednog subjekta „Dujmović Commerce“ d.o.o. Mostar, Blajbuških žrtava bb, Mostar, zaprimljenoj dana 10.06.2009. godine pod brojem: 01-01-26-022-II/09, Konkurencijsko vijeće, na 91. (devedesetprvoj) sjednici održanoj dana 21.07.2009. godine, je donijelo

R J E Š E N J E

1. Ocjenjuje se dopuštenom koncentracija na tržištu trgovine na malo mješovitom robom, prehrambenim proizvodima, pićem i proizvodima široke potrošnje za domaćinstvo u Bosni i Hercegovini, a koja će nastati dugoročnim zakupom poslovnih prostora privrednog subjekta „Dujmović Commerce“ d.o.o. Mostar, Blajbuških žrtava bb, Mostar, od strane privrednog subjekta „Konzum“ trgovina na veliko i malo d.o.o. Sarajevo, Rajlovačka bb, Sarajevo.
2. Ovo Rješenje o koncentraciji se upisuje u Registar koncentracija.
3. Ovo Rješenje je konačno i bit će objavljeno u «Službenom glasniku BiH», službenim glasilima entiteta i Brčko Distrikta Bosne i Hercegovine.

O b r a z l o ž e n j e

Konkurencijsko vijeće je dana 10.06.2009. godine zaprimilo Prijavu namjere koncentracije (dalje u tekstu: Prijava) sticanjem kontrole u privrednom subjektu „Dujmović Commerce“ d.o.o. Mostar, Blajbuških žrtava bb, 88000 Mostar, Bosna i Hercegovina (dalje u tekstu: „Dujmović Commerce“) od strane privrednog subjekta „Konzum“ trgovina na veliko i malo d.o.o. Sarajevo, Rajlovačka bb, 71000 Sarajevo, Bosna i Hercegovina (dalje u tekstu: Konzum Sarajevo ili Podnosilac prijave), kojeg zastupa direktor Ismir Brkić.

Uvidom u podnesenu Prijavu utvrđeno je da ista nije uredna i kompletna, u smislu člana 30. stav (1) Zakona o konkurenciji (u daljem tekstu: Zakon) i čl. 8., 9. i 10. Odluke o načinu podnošenja prijave i kriterijima za ocjenu koncentracija privrednih subjekta («Službeni glasnik BiH», broj 95/06), te je Konkurencijsko vijeće, u skladu sa članom 31. Zakona, dopisom broj: 01-01-26-022-1-II/09 od 22.06.2009. godine, zatražilo dopunu prijave.

Podnosilac prijave je u skladu sa zahtjevom Konkurencijskog vijeća, istu dopunio dana 26.06.2009. godine podneskom broj: 01-01-26-022-2-II/08.

Nakon toga, Konkurencijsko vijeće je dana 30.06.2009. godine Podnosiocu prijave izdalo Potvrdu broj: 01-01-26-022-3-II/09 o prijemu uredne i kompletne prijave, u smislu člana 30. stav (3) Zakona.

U skladu sa članom 30. stav (2) Zakona Podnosilac prijave navodi da nije podnio niti namjerava podnijeti zahtjev za ocjenu koncentracije nekom drugom tijelu ovlaštenom za ocjenu koncentracija izvan teritorije Bosne i Hercegovine, s obzirom da učesnici koncentracije posluju isključivo na teritoriji Bosne i Hercegovine.

Konkurencijsko vijeće je utvrdilo da je Prijava podnesena u propisanom roku, u smislu člana 16. stav (1) Zakona.

1. Učesnici koncentracije

Učesnici koncentracije su privredni subjekti Konzum trgovina na veliko i malo d.o.o. Sarajevo, Rajlovačka bb, Sarajevo, BiH i „Dujmović Commerce“ d.o.o. Mostar, Blajbuških žrtava bb, 88000 Mostar, BiH.

1.1. Privredni subjekt Konzum Sarajevo

Privredni subjekt Konzum trgovina na veliko i malo d.o.o. Sarajevo je rješenjem Kantonalnog suda Sarajevo broj UF/I-340/04 od dana 08.03.2004. godine upisan u sudski registar pod nazivom «Veleprodajni centar» trgovina na veliko i malo d.o.o. Sarajevo, a nakon toga je Rješenjem Općinskog suda u Sarajevu broj 065-0-Reg-07-003892 od dana 22.01.2008. godine, naziv ovog privrednog subjekta promjenjen u „Konzum“ trgovina na veliko i malo d.o.o. Sarajevo, sa matičnim brojem 1-24542.

Osnovna djelatnost privrednog subjekta Konzum Sarajevo je trgovina na veliko i malo prehrambenim proizvodima, pićima, duhanskim proizvodima te robom široke potrošnje za domaćinstvo. Osnivač i 100% vlasnik privrednog subjekta Konzum Sarajevo je privredni subjekt „Konzum“ trgovina na veliko i malo d.d. Zagreb, Marijana Čavića 1/a, Zagreb, Republika Hrvatska (u daljem tekstu „Konzum“ d.d. Zagreb).

Prema podacima iz Prijave većinski vlasnik privrednog subjekta „Konzum“ d.d. Zagreb je privredni subjekt „Agrokor“ d.d. Zagreb, Republika Hrvatska, sa (..)**¹ % udjela u vlasništvu, zatim privredni subjekt „Jamnica“ d.d. Zagreb, Republika Hrvatska ima (..)** % udjela, te privredni subjekt „Investco vrijednosnice“ d.o.o. Zagreb, Republika Hrvatska sa (..)** % udjela, dok ostali dioničari iz Republike Hrvatske imaju (..)** % udjela.

Većinski vlasnik privrednog subjekta „Agrokor“ d.d. Zagreb je fizičko lice Todorčić Ivica iz Zagreba sa (..)** % vlasništva.

1.1.2. Povezana društva privrednog subjekta Agrokor d.d. Zagreb

Privredni subjekt „Agrokor“ d.d. Zagreb, kao većinski vlasnik privrednog subjekta „Konzum“ d.d. Zagreb, većinski je vlasnik slijedećih privrednih subjekata u Bosni i Hercegovini: „INIT“ d.d. Sarajevo (glavna djelatnost: informatičke usluge) sa (..)** % vlasničkog udjela, TP Distributivni centar d.d. Sarajevo (glavna djelatnost: trgovina na veliko) sa (..)** % vlasničkog udjela i

¹ (..)** podaci predstavljaju poslovnu tajnu

„Agrokor-Zagreb“ d.o.o. Grude (glavna djelatnost: uvoz i distribucija) sa (..)**² % vlasničkog udjela.

Privredni subjekt „Konzum“ d.d. Zagreb, kao većinski vlasnik privrednog subjekta Konzum Sarajevo, također nema subsidijarnih društava na teritoriji Bosne i Hercegovine.

Privredni subjekt Konzum Sarajevo nema udjela, dionica ili bilo kakvih glasačkih prava niti u jednom privrednom subjektu u Bosni i Hercegovini.

Privredni subjekt „Agrokor“ d.d. Zagreb, preko svojih supsidijarnih društava registrovanih u Republici Hrvatskoj, indirektno kontroliše slijedeće privredne subjekte u Bosni i Hercegovini:

„Sarajevski Kiseljak“ d.d. Sarajevo (glavna djelatnost: proizvodnja mineralnih voda i osvježavajućih pića) preko privrednog subjekta Jamnica d.d. Zagreb, sa (..)**% udjela, „Ledo“ d.o.o. Čitluk (glavna djelatnost: proizvodnja sladoleda i smrznutog voća i povrća) preko privrednog subjekta „Ledo“ d.d. Zagreb sa (..)**% udjelom, zatim „Zvijezda“ d.o.o. Sarajevo (glavna djelatnost: proizvodnja jestivog ulja i margarina) preko privrednog subjekta „Zvijezda“ d.o.o. Zagreb sa (..)**% udjela i „PIK“ Vrbovec BH d.o.o. Sarajevo (glavna djelatnost: trgovina mesnim prerađevinama) preko privrednog subjekta „PIK“ Vrbovec, Vrbovec, sa (..)**% udjela.

1.2. Privredni subjekt «Dujmović-Commerce»

Privredni subjekt «Dujmović-Commerce» sa sjedištem u Mostaru, Blajbuških žrtava bb, registrovan je dana 21.06.2000. godine i upisan pod brojem U/I-979/2000 u sudski registar Općinskog suda u Mostaru, sa matičnim registarskim brojem 1-3584, za obavljanje unutrašnje i spoljne trgovine.

Jedini osnivač i 100% vlasnik ovog privrednog subjekta je Dujmović Zoran nastanjen u(..)**², JMBG ((..)**).

Prema podacima iz Prijave privredni subjekat «Dujmović-Commerce» ne posjeduje 10% ili više udjela u osnovnom kapitalu u bilo kojem drugom privrednom subjektu u Bosni i Hercegovini.

2. Obaveza prijave namjere koncentracije

Obaveza prijave namjere koncentracije privrednih subjekata, u smislu odredbe člana 14. stav (1) Zakona, postoji ako ukupni godišnji prihod svakog od najmanje dva učesnika koncentracije ostvaren prodajom roba i/ili usluga na tržištu Bosne i Hercegovine iznosi najmanje 5.000.000,00 KM, po završnom računu u godini koja je prethodila predmetnoj koncentraciji.

Ukupni prihodi učesnika koncentracije, na dan 31.12.2008. godine nakon odbijenog poreza na dodanu vrijednost i drugih poreza, koji se direktno odnose na promet i rabat, u smislu člana 14. Zakona:

Tabela 1.

Red.br.	Naziv privrednog subjekta	Prihod u BiH (KM)
01.	Konzum Sarajevo	(..)**
02.	Dujmović-Commerce	(..)**

Izvor: podaci iz Prijave

² (..)** podaci predstavljaju poslovnu tajnu

Ukupni prihod učesnika koncentracije ostvaren prodajom roba na tržištu BiH iznosi preko 5.000.000,00 KM po završnom računu u godini koja je prethodila koncentraciji, odnosno, ukupni godišnji prihod privrednog subjekta Konzum u 2008. godini na nivou Bosne i Hercegovine iznosio je (..)**³ KM, dok je privredni subjekt Dujmović-Commerce u istom periodu ostvario ukupni prihod u iznosu od (..)**KM.

Iz navedenog proizilazi obaveza podnošenja prijave namjere koncentracije u smislu člana 16., a u vezi sa članom 14. stav (1) tačka a) Zakona.

3. Pravni okvir ocjene koncentracije

Konkurencijsko vijeće je u provođenju postupka ocjene dopuštenosti predmetne koncentracije primjenilo odredbe Zakona, Odluke o utvrđivanju relevantnog tržišta («Službeni glasnik BiH», broj 18/06), Odluke o načinu podnošenja prijave i kriterijima za ocjenu koncentracija privrednih subjekata.

4. Pravni osnov i oblik koncentracije

Pravni osnov predmetne koncentracije je Ugovor o poslovnoj saradnji, zakupu i podzakupu poslovnih prostora, zaključen dana 03.06.2009. godine, između Zorana Dujmovića iz (..)** (JMBG (..)**), nastanjenog u ulici (..)** kao zakupodavca i privrednog subjekta Konzum Sarajevo, kojeg zastupa direktor Ismir Brkić (dalje u tekstu: Ugovor).

Predmetnim Ugovorom privredni subjekt Konzum Sarajevo, uzima od Zorana Dujmovića u zakup 8 poslovnih prostora, koji se nalaze na području grada Mostara, na vremenski period od 10 godina. Ovim ugovorom privredni subjekt Konzum Sarajevo uzima na korištenje trgovačku opremu, strojeve i uređaje koji se nalaze u poslovnim prostorima koji se uzimaju u zakup. Privredni subjekt Konzum Sarajevo će od privrednog subjekta Dujmović-Commerce (čiji je jedini osnivač i vlasnik zakupodavac) preuzeti i zalihe trgovačke robe, koja se zatekne u poslovnim prostorima na dan primopredaje, osim oštećene robe i robe s isteklim rokom upotrebe. Ugovorom je također definisano da privredni subjekt Konzum Sarajevo može preuzeti radnike privrednog subjekta Dujmović-Commerce, čija su radna mjesta u poslovnim prostorima, koji se uzimaju u zakup.

U skladu sa naprijed navedenim, a na osnovu člana 12. stav (1) tačka b) pod 3. Zakona, pravni oblik koncentracije je sticanje kontrole jednog privrednog subjekta nad drugim u skladu sa odredbama zakona, koje regulišu osnivanje privrednih subjekata i njihovo upravljanje.

5. Relevantno tržište

Relevantno tržište, u smislu člana 3. Zakona, te čl. 4., 5. i 6. Odluke o utvrđivanju relevantnog tržišta, čini tržište određenih proizvoda/usluga koje su predmet obavljanja djelatnosti na određenom geografskom tržištu.

Prema odredbi člana 4. Odluke o utvrđivanju relevantnog tržišta relevantno tržište proizvoda obuhvaća sve proizvode i/ili usluge za koje potrošači smatraju da su međusobno zamjenjivi obzirom na njihove bitne karakteristike, kvalitet, namjenu, cijenu ili način upotrebe.

³ (..)** podaci predstavljaju poslovnu tajnu

Nadalje, prema članu 5. Odluke o utvrđivanju relevantnog tržišta relevantno tržište u geografskom smislu obuhvaća cijelu ili dio teritorije Bosne i Hercegovine, na kojoj tržišni konkurenti djeluju u prodaji i/ili kupovini relevantnog proizvoda pod jednakim ili dovoljno ujednačenim uslovima koji to tržište bitno razlikuju od uslova tržišne konkurencije na susjednim geografskim tržištima.

Prilikom analize relevantnog tržišta učesnika predmetne koncentracije Konkurencijsko vijeće je utvrdilo da je relevantno tržište predmetne koncentracije tržište trgovine na malo mješovitom robom, prehrambenim proizvodima, pićem i proizvodima široke potrošnje za domaćinstvo.

Prilikom određivanja relevantnog tržišta Konkurencijsko vijeće je uzelo u obzir činjenicu da privredni subjekt Konzum Sarajevo posluje na cijeloj teritoriji Bosne i Hercegovine.

Slijedom navedenoga, relevantnim tržištem predmetne koncentracije smatra se tržište trgovine na malo mješovitom robom, prehrambenim proizvodima, pićem i proizvodima široke potrošnje za domaćinstvo na cijeloj teritoriji Bosne i Hercegovine.

6. Analiza relevantnog tržišta

Tržišni udjeli privrednog subjekta Konzum Sarajevo i njegovih glavnih tržišnih konkurenata u 2008. godini su:

Tabela 2.

Red.broj	Naziv privrednog subjekta	Tržišni udio (%)
01.	Konzum d.o.o. Sarajevo	10,00
02.	Interex d.o.o. Sarajevo	6,00
03.	Bingo d.o.o. Tuzla	6,00
04.	Merkator d.o.o. Sarajevo	5,00
05.	Mims d.o.o. Sarajevo	4,00
06.	Delta Maxi Banjaluka	4,00
07.	Drvopromet Sarajevo	3,00
08.	Robot Sarajevo	2,00
09.	TUŠ d.o.o. Bihać	2,00
10.	Ostali trgovački lanci	10,00
11.	Mali trgovci	48,00
	UKUPNO:	100,00

Izvor: podaci iz Prijave

Podnosilac prijave u Prijavi procjenjuje da tržišni udio privrednog subjekta Dujmović Commerce na relevantnom tržištu u Bosni i Hercegovini iznosi manje od 1%, uzimajući u obzir ostvareni godišnji prihod i broj maloprodajnih objekata (sedam poslovnih prostora u području grada Mostara).

Na osnovu podataka iz Tabele 2. vidljivo je da najveći tržišni udio na relevantnom tržištu od 10,0% ima privredni subjekt Konzum Sarajevo, a slijede ga privredni subjekti Interex - Sarajevo, sa 6,0 % i Bingo Tuzla sa 6,0% tržišnog udjela, te Merkator sa 5,00 % tržišnog udjela.

Navedeni podaci pokazuju da je relevantno tržište slabo koncentrirano, jer postoji veliki broj privrednih subjekata s relativno malim pojedinačnim tržišnim udjelima, koji onemogućavaju stvaranje dominantnog položaja.

Preuzimanjem poslovnih prostora drugoročnim zakupom, privredni subjekt Konzum Sarajevo u predmetnoj koncentraciji preuzima tržišne udjele privrednog subjekta Dujmović Commerce na relevantnom tržištu, koji iznose manje od 1,0%, te je Konkurencijsko vijeće utvrdilo da su zajednički tržišni udjeli učesnika koncentracije na relevantnom tržištu znatno ispod tržišnog udjela od 40,0%, koji predpostavlja da privredni subjekt može imati dominantni položaj, u smislu člana 9. Zakona.

7. Ocjena predmetne koncentracije

Konkurencijsko vijeće je nakon procjene i analize podataka i činjenica u smislu člana 17. Zakona, u postupku donošenja predmetnog Rješenja utvrdilo da koncentracija predmetnih privrednih subjekata ne spriječava, ograničava niti narušava tržišnu konkurenciju na tržištu trgovine na malo mješovitom robom, prehrambenim proizvodima, pićem i proizvodima široke potrošnje za domaćinstvo u Bosni i Hercegovini.

Pri donošenju ove odluke Konkurencijsko vijeće posebno je imalo u vidu da ova koncentracija nije značajno povećala tržišne udjele učesnika koncentracije na relevantnom tržištu.

Predmetnom koncentracijom će se osigurati unapređenje distribucije robe, odnosno, skraćivanje tokova distribucije robe, te poboljšati snabdijevanje tržišta i proširiti asortiman robe, što može uticati na snižavanje cijena iste, a što sve za krajni rezultat može imati dobrobit potrošača.

Uzimajući u obzir sve navedene činjenice i podatke koji su prethodili donošenju odluke, Konkurencijsko vijeće je ocijenilo predmetnu koncentraciju dopuštenom, u smislu člana 18. stav (2) pod a) Zakona, kao što je odlučeno u dispozitivu ovog Rješenja.

8. Administrativna taksa

Na ovo Rješenje podnosilac Prijave, u skladu s članom 2. tarifni broj 107. stav (1) tačka d) 1) Odluke o administrativnim taksama u vezi sa procesnim radnjama pred Konkurencijskim vijećem («Službeni glasnik BiH», broj 30/06), obavezan je platiti administrativnu taksu u iznosu od 2.500,00 KM u korist Budžeta institucija Bosne i Hercegovine.

9. Uputstvo o pravnom lijeku

Protiv ovog Rješenja nije dozvoljena žalba.

Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema ovog Rješenja odnosno od dana njegovog objavljivanja.

Predsjednik

dr Stjepo Pranjić